


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-76	Ad-Dahr	31	2	Madaniyyah*	Ke-98	5



Zaman Diturunkan

1. 22 Ayat di permulaan Surah ad-Dahr diturunkan di peringkat awal kehidupan Rasulullah di Mekah antara tahun ke-1 hingga ke-3 Kenabian. Ketika itu seruan Islam disebarkan secara sulit dan senyap-senyap, di peringkat itu jugalah turun Surah al-Qiyaamah dan Surah an-Naba'. 6 Ayat di akhir Surah ad-Dahr pula berkemungkinan diturunkan pada tahun ke-4 Kenabian setelah da'wah secara terbuka bermula. Antara kesalahan pemimpin-pemimpin Quraisy yang disebutkan di dalam surah ini ialah mereka adalah golongan آثم (berdosa) dan كُفُور (tidak bersyukur), masyarakat ditegah daripada mentaati pemimpin-pemimpin seperti itu وَلَا تُطِيعْهُمْ أَيُّهَا أَوْ كُفُورًا (Ayat: 24). Antara sifat-sifat pemimpin yang ditegah orang ramai mengikuti mereka ialah mereka terlalu cintakan dunia dan lalai daripada hari kiamat (Ayat: 27).

إِنَّ هَؤُلَاءِ يُحِبُّونَ الْعَاجِلَةَ وَيَذَرُونَ وَرَاءَهُمْ يَوْمًا ثَقِيلًا ﴿٢٧﴾

27. Sesungguhnya orang-orang (yang menentangmu) itu sentiasa mencintai (kesenangan dan kemewahan dunia) yang cepat habisnya, serta mereka membelakangkan (tidak menghiraukan bekalan) untuk hari akhirat yang amat berat (penderitaannya kepada orang-orang yang tidak bertaqwa).

Antara Ciri Khusus Surah Ad-Dahr

1. Di dalam Surah ad-Dahr akibat buruk daripada kekufuran telah disebutkan dengan mengguna 3 perkataan secara umum sahaja, sedangkan berkenaan dengan ganjaran kerana bersyukur kepada Allah pula terdapat perincian dan penjelasan yang agak banyak.
2. Di dalam surah ini dikemukakan perbandingan di antara pemimpin yang baik dan pemimpin yang tidak baik, pemimpin yang baik ialah yang cintakan Allah dan takutkan hari akhirat, kerana itu ia memberi makan kepada orang-orang miskin, anak-anak yatim dan orang-orang tawanan. Sementara pemimpin yang فاسق, فاجر dan buruk pekertinya pula adalah yang cintakan dunia, mementingkan diri sendiri dan tidak percaya kepada hari kemudian.

Kelebihan Surah Ad-Dahr

Rasulullah s.a.w. membaca Surah as-Sajdah dan هَلْ أَتَى عَلَى الْإِنْسَانِ dalam sembahyang Subuh hari Juma'at. Shahih Muslim, Kitab Shalat Juma'at, hadits 2,068, riwayat daripada Ibnu 'Abbas.

Perkaitan Surah Ad-Dahr Dengan Surah Sebelum Dan Selepasnya

1. Di dalam Surah al-Muddatstsir telah disebutkan sikap dan perangai negatif Walid bin al-Mughirah, di dalam Surah al-Qiyaamah selepasnya pula disebutkan pendustaan oleh Abu Jahal dan di dalam Surah ad-Dahr ini pula masyarakat diperintahkan supaya tidak mentaati pemimpin-pemimpin yang berdosa, jahat dan tidak bersyukur.
2. Di dalam Surah al-Qiyaamah terdapat firman Allah ini (Ayat: 20-21):

كَلَّا بَلْ تُحِبُّونَ الْعَاجِلَةَ ۖ وَتَذُرُونَ الْآخِرَةَ ﴿٢٠﴾

Di dalam Surah ad-Dahr ini pula Allah berfirman (Ayat: 27):

إِنَّ هَؤُلَاءِ يُحِبُّونَ الْعَاجِلَةَ وَيَذُرُونَ وَرَاءَهُمْ يَوْمًا ثَقِيلًا ﴿٢٧﴾

Kedua-dua surah menggambarkan betapa kecintaan kepada dunia dan tidak adanya kesedaran tentang tanggungjawab yang akan dipersoalkan di akhirat nanti di kalangan pemimpin-pemimpin Quraisy.

3. Di dalam Surah al-Mursalaat selepas ini pula, dalil-dalil اَفَاقِي, اَنَفْسِي dan تَارِيخِي diberikan supaya pemimpin-pemimpin materialistik yang tidak percaya kepada hari kiamat dapat menerima adanya hari kiamat itu.

Beberapa Kata Kunci Dan Tema Utama Surah

1. Jalan Islam yang betul (سَبِيل).

Di dalam Surah ad-Dahr, perkataan سَبِيل ada tersebut di permulaannya dan di akhirnya. السَّبِيل, السَّبِيل (Ayat: 3 dan 29). Melaluinya manusia diberikan hak kebebasan untuk memilih agama.

- (a) Dikatakan kepada manusia bahawa mereka bebas memilih agama, sama ada mahu memilih kehidupan penuh dengan kesyukuran atau kehidupan yang tidak bersyukur (Ayat: 3).

إِنَّا هَدَيْنَاهُ السَّبِيلَ إِمَّا شَاكِرًا وَإِمَّا كَفُورًا ﴿٣﴾

- (b) Perkara yang sama diulangi di akhir surah, inilah yang merupakan mesej utama surah sebenarnya dan ia dikemukakan oleh al-Qur'an dengan cara yang tersendiri (Ayat: 29).

إِنَّ هَذِهِ تَذْكِرَةٌ فَمَنْ شَاءَ اتَّخَذْ إِلَىٰ رَبِّهِ سَبِيلًا ﴿٢٩﴾

2. Di dalam Surah ad-Dahr, beberapa perkataan telah digunakan untuk orang-orang yang baik seperti شَاكِر (orang yang bersyukur) (Ayat: 3), اَبْرَار (orang-orang baik dan setia), عِبَادُ اللَّهِ (hamba-hamba Allah).
3. Beberapa perkataan untuk orang-orang yang jahat juga digunakan di dalam surah ini seperti كَافِر (orang yang tidak bersyukur) (Ayat: 3), كَفُور (sangat tidak bersyukur) (Ayat: 24), ظَالِمِينَ (orang-orang yang zalim) (Ayat: 31).